

# Malaysia komited tingkat penjagaan kesihatan

**Kuala Lumpur:** Malaysia komited meningkatkan Perjanjian Pengiktirafan Bersama (MRA) dan menjadi penggerak dalam usaha mewujudkan kawal selia lebih cekap serta bersepadu dalam sistem penjagaan kesihatan di rantau ini.

Perdana Menteri, Datuk Seri Anwar Ibrahim, berkata ini termasuk memastikan keselamatan bagi peranti perubatan, memperkukuh sistem penjagaan pesakit, penambahbaikan infrastruktur dan penggunaan teknologi moden dalam rawatan.

Beliau berkata, aspek kesihatan menjadi satu daripada tong-

gak penting dalam ASEAN, dan sebahagian daripada strategi di bawah Pelan Induk Perindustrian Baharu 2030 (NIMP 2030).

"Mengambil kira peranan sebagai Pengerusi ASEAN semakin hampir iaitu pada 2025, Malaysia komited sepenuhnya untuk meningkatkan MRA dan memimpin usaha mewujudkan kawal selia lebih cekap dan bersepadu bagi rangka kerja di rantau ini.

"Tumpuan utama kepengurusan ASEAN tahun depan adalah mewujudkan grid tenaga ASEAN, manakala yang kedua (tumpuan) digitalisasi dan penjagaan kesihatan.

"Ia dikenal pasti sebagai tonggak pertumbuhan mampan bukan sahaja di bawah strategi ASEAN tetapi menjadi fokus di bawah NIMP 2030," katanya.

Beliau berkata demikian ketika berucap pada Majlis Penutup Pameran dan Persidangan Peranti Perubatan Antarabangsa 2024 di sini semalam.

Yang turut hadir, Menteri Kesihatan, Datuk Seri Dr Dzulkefly Ahmad dan Menteri Ekonomi, Rafizi Ramli.

Anwar berkata, Kementerian Kesihatan (KKM) berdepan cabaran cukup besar untuk merealisasikan hasrat menjadikan Malaysia hab pembuatan per-

ubatan berteknologi tinggi dan inovasi penjagaan kesihatan.

"Kita lihat penekanan negara ini dalam bidang transformasi digital dan AI (kecerdasan buatan) adalah secara bersungguh-sungguh. Jadi, ia memerlukan kesediaan rakan-rakan yang memimpin KKM, khususnya Dr Dzulkefly menerimanya sebagai satu cabaran dan ia tentu menuntut perubahan yang agak mendadak.

"(Ini termasuk) masalah perolehan yang lebih telus, yang boleh memberi manfaat kepada rakyat dan tidak terikat dengan peraturan, kaedah dan pendekatan lama.

"(Selain itu) soal jaringan yang tentunya akan dapat diperbaiki dengan kemudahan digital dan AI yang kita perkenalkan termasuk di KKM," katanya.

Beliau berkata, pembinaan ekosistem digital yang kukuh melalui penubuhan Pejabat Kecerdasan Buatan Kebangsaan (NAIO) adalah satu kemestian dalam usaha mengangkat Malaysia sebagai sebuah negara berpendapatan tinggi.

Katanya, ini kerana status negara berpendapatan tinggi itu hanya boleh dicapai sekiranya didorong oleh penggunaan digital.